

SIMAR cu directiva nobo pa añanan sindical 2014-2016

ORANJESTAD (AAN): Den e reunion general anual cu a tuma luga diamars anochi 29 di april na sede di SIMAR, miembronan a eligi nan directiva pa añanan sindical 2014-2016. E constelacion nobo ta compañañanan: Natalie Carlo, Maroeschka Cornelie, Carolina Kelkboom, Sheila Tromp (tur cuatro reeligi) y Aquannette Gunn.

Presidente saliente, Sr. Igmarr Davelaar, pa motibonan personal no a pone su mes reeligibel. Den un relato cortico Sr. Davelaar a conta na prome luga tocante su retonan y trabounan y a menciona cu entre otro un di su metanan tabata pa trece tranquilidad den e sindicato y esaki a logra tambe. Na di dos luga Sr. Davelaar a gradici demas miembronan di directiva pa nan trabou, nan dedicacion y nan perseverancia a pesar cu e directiva tabata consisti di solamente cinco persona. A gradici na e ocasion aki tambe miembronan di comision di caha Sra. Aquannette



Gunn y Sr. Dimitri Frans y tambe e miembronan di SIMAR pa nan confiansa den dje. Por ultimo Sr. Davelaar a laga sa cu e directiva nobo por conta cu su sosten y ayu-

do na tur momento. Den e reunion aki trata tambe diferente puntonan. Entre otro: relatonan di secretaria, tesorero, y di comision di caha. E presupuesto pa 2014

tambe a keda aproba. Mester remarca cu pa prome biaha den historia di SIMAR e directiva ta consisti completamente di damanan. Diamars awo e directiva nobo lo

reuni pa reparticion di tarea. Entre otro lo dicidi cua di e cinco damanan lo guia e sindicato como presidente pa e proximo dos añanan sindical.